

PENTEKOSTE IGANDEA (C)

Otoitza

Pentekoste-misterioaren bidez, Jauna,
herri eta jendalde guztietan santutzen duzu zeure Eliza;
isur itzazu Espiritu Santuaren dohainak
mundu zabalaren gainera,
eta berri itzazu orain fededunen bihotzetan,
Ebanjelio zabaltzearen hasieran
errukiz egin zenituen mirariak.
Zure Seme Jesu Kristo.

I. IRAKURGAIA: Ap Eg 2, 1-11

*Guztiak Espiritu Santuaz bete ziren
eta mintzatzen hasi.*

Apostoluen Eginetatik

Iritsi zen Pentekoste-eguna, eta ikasle guztiak elkarrekin leku berean bildurik zeuden; bat-batean, zerutik hots bat etorri zen, haize bolada indartsu batena bezalakoa, eta haiek zeuden etxe dena bete zuen.

Suzkoak bezalako mihi batzuk agertu zitzaizkien; banatu ziren hauek eta bakoitzaren gainean gelditu. Guztiak Espiritu Santuaz bete ziren eta hizkuntza arrotzetan mintzatzen hasi, bakoitzari Espirituak ematen zion bezala.

Bazen egun haietan Jerusalemene judutar jainkozalerik asko, zerupearan diren herri guztietakoak. Hots hura entzun zenean, jendetza haundia bildu zen eta harriturik gelditu, norberaren hizkuntzan mintzo zirela entzunda.

Harri ta zur eginik, honela zioten: «Ez al dira, bada, galilearrak, hizketan ari diren guzti horiek? Nola entzuten diegu, bada, bakoitzak geuen jatorriko hizkuntzan? Gure artean badaude partiarrak, mediarrak, elamdarrak; badaude Mesopotamian, Judean, Kapadozian, Ponton, Asian, Frigian, Panfilian, Ejipton eta Zirene ondoko Libian bizi direnak; badaude erromatarrak, judutarrak eta proselitoak, greziarrak eta arabiarrek; eta denok geure hizkuntzan entzuten diegu Jaungoikoaren mirariak adierazten».

ERANTZUN SALMOA: Sal 103, 1ab eta 24. 29-30. 31 eta 34

**R/. Bidal ezazu, Jauna, zure arnasa,
eta berriarazi lur-azala.**

Edota: **Aleluia.**

Ene arima, goretsazu Jauna!
Guztiz haundi zaitut, Jauna, ene Jainkoa!
Bai ugari direla, Jauna, Zuk eginak,

zuhurtasunez eginak zeharo,
lurra zure sorkariz betea dago! R/.

Aurpegia gordetzen baduzu, ikara dira,
arnasa kentzen badiezu, hiltzen,
beren hautsetara dira bihurtzen.
Zure arnasa bidaltzen baduzu,
izatea ematen diezu;
lur-azala berriarazten duzu. R/.

Izan bedi Jaunaren ospea sekuletan,
poztu bedi Jauna, Berak eginetan.
Atsegin bekio nire leloa,
nire poza da Jainkoa. R/.

II. IRAKURGAIA: 1 Ko 12, 3b-7. 12-13

*Gu guztiok Espiritu berberarengan bataiatuak izan gara,
gorputz bat bakarra izateko.*

San Paulo Apostoluak Korintotarrei

Senideok: Ezin dezake inork esan: «Jauna da Jesus!» Espiritu Santuak eraginez izan ezik.
Era askotakoak dira dohainak, baina bat bera Espiritua; era askotakoak zerbitzuak, baina bat bera Jauna; era askotakoak eginbideak, baina bat bera guztiengan dena egiten duen Jaungoikoa.
Bakoitzari guztien onerako ematen zaio Espirituaren agerpena.
Gorputza bat izanik ere, atal asko dituen bezala, eta gorputzeko atal guztiak, asko izanik ere, gorputz bat diren bezala, berdin Kristo ere. Gu guztiok —judutar nahiz greziar, menpeko nahiz askatu— Espiritu berberarengan bataiatuak izan gara, gorputz bat bakarra izateko. Eta guztiok Espiritu bakarretik edan dugu.

Neurtitza

Zatoz, bai, Gogo Guren
eta bidal zerutik
Zure argi izpia.
Zatoz, gaixoen aita,
zatoz, dohain emaile,
zatoz, bihotzen argi.

Poz emaile bikaina,
etxelagun atsegin,
sargorian haize pin.
Lan artean atsedean,
nekean aringarri,
malkoetan pozgarri.

Bete, argi dohatsu,

zintzoen bihotzeko
zirrikurik barnena.
Zure laguntza gabe
ez du gizakiak ezer,
ez du ezer on denik.

Garbi, zikin dagoena,
busti, lehor dagoena,
zauriak oro senda.
Zurrun dena bigundu,
makur dena zuzendu,
hotz dagoena berotu.

Zugan uste on duten
zintzoei isuri
zazpi dohain zerutik.
Zintzo saria eman,
osasun hil artean,
poza betierean.
Amen. Aleluia.

EBANJELIOA: Jn 20, 19-23

Aleluia

R/. Aleluia.

V/. Zatoz, Espiritu Santu!

Bete itzazu zure fededunen bihotzak,
eta piztu haiengan zure maite sua. R/.

*Aitak Ni bidali nauen bezala,
Nik ere bidaltzen zaituztet zuek:
Hartzazue Espiritu Santua.*

Jesu Kristoren Ebanjelioa San Joanen liburutik

Astearen lehenengo eguneko ilunabarrean, etxe batean bildurik zeuden ikasleak, atea itxita, judutarren beldurrez. Sartu zen Jesus eta, haien erdian zutik, esan zien: «Bakea zuekin». Hori esanda, eskuak eta saihetsa erakutsi zizkien. Eta ikasleak pozez beterik gelditu ziren, Jauna ikustean.

Jesusek berriz ere: «Bakea zuekin. Aitak ni bidali nauen bezala, Nik ere bidaltzen zaituztet zuek». Eta hori esanez, haizeman zuen haien gainera, eta esan zien: «Hartzazue Espiritu Santua: zuek bekatuak barkatzen dizkiezuenei, barkatuak gelditzen zaizkie; eta lotzen dizkiezuenei, lotuak gelditzen zaizkie».

Oparigaien gainekoa

Jainko Jauna, Espiritu Santuak argiago ager diezagula
opari honen misterioa,

zure Semeak agindu zigun bezala;
 eta eraman gaitzala
 Hark erakutsitako egia bete-betean ezagutzera.
 Jesu Kristo.

Prefazioa: Pentekoste-misterioa

V/. Jauna zuekin.
 R/. **Eta zure espirituarekin.**
 V/. Gora bihotzak.
 R/. **Jaunagan dauzkagu.**
 V/. Eskerrak Jaungoiko gure Jaunari.
 R/. **Egoki da eta zuzen.**

Egoki da, bai, eta zuzen
 nonnahi eta beti Zuri eskerrak ematea,
 Jauna, Aita guztiz santu,
 Jaungoiko ahalguztidun betiereko Horri.

Pazko misterioa bere betera eraman nahirik,
 Espiritu Santua bidali zenuen gaurko egunez
 Kristorengan zure seme-alaba egindakoen gainera;
 Espiritu hori izan zuen Elizak bere arima sortze egunetik;
 Espiritu horrek ekarri zituen herri guztiak Jainkoa ezagutzera;
 Espiritu berak elkartu zituen, fede beraren aitormenean,
 bekatuak hizkuntza ezberdinetan banatutakoak.

Horregatik, Pazko pozez gainezka daude
 gizon-emakume guztiak mundu zabalean.
 Zeruko indar eta aingeru guztiek ere
 horregatik dute beti
 zure aintzaren gorespina kantatzen:

Santu, Santu, Santua...

Jaunartze ondorengoa

Jainko Jauna, Zuk ematen dizkiozu Elizari zeruko dohainak;
 zaindu ezazu Berarengan Zeuk eman diozun grazia;
 Espiritu Santuak indar gaitzala beti,
 eta hartu dugun Eukaristiak eraman gaitzala
 salbamenaren betera.
 Jesu Kristo.

Pazko-agurra

V/. Zoazte Jaunaren bakean, aleluia, aleluia.
 R/. **Eskerrak Jainkoari, aleluia, aleluia.**